

欽定續文獻通考



欽定續文獻通考卷二十五

市糴考

臣等謹案馬端臨作市糴考其於市則始自周官泉府之法而迄於宋寧宗嘉泰時其於糴則始自齊管仲魏李惲糴糴斂散之法而迄於宋寧宗嘉定時凡歷朝之得失於茲略具已以市法而言宋自寧宗以後屢講求和買而有重額之弊有暗科之弊貽害實多金元時每申抑配需索之禁明初凡民間貨物價值令親民官按月申報以憑照價收買其後中使四出以采辦爲名任意虐取而民不勝其滋擾若夫市舶互市之法遼金各有權場元既定江南始立市舶之制明初於沿海設三市舶司逮倭患既興而市舶尋罷至於馬市之設原所以戢邊嘉靖時宣府大同之馬市朝議以爲大害其實總由於威令不行駕馭無策非盡互市之必不可開也以糴而言則常平義倉和糴之制遼金元及明雖時廢時置亦曾兼采而用之然或沿爲具文或視爲利藪名存實亡故諸弊叢出而非盡古法之必不可行於後也今自宋慶元而後以至於明凡市糴之可考者俱依次臚載庶知法與人之不可偏廢而裕國利民之道亦未嘗不相資云

均輸市易和買

宋寧宗慶元二年五月減諸路和市折帛錢三年 帝初卽位卽詔兩浙江東西和買紬絹折帛錢太重可自來年足減錢一貫五百文三年後別聽旨所減之錢令內藏封樁兩庫撥還事在紹熙五年十月至慶元元年戶部侍郎袁說友上言臨安餘杭二縣和買科取之弊乞將餘杭縣經界元科之額配以絹數不分等則以二十四貫定數一疋衰科而下足額而止捐其餘以惠未產之民如此則吏不得而制民民無資於詭戶亦救弊之良策也詔令集議

是年議上如所奏行之 宋史趙必愿傳曰必愿知處州陳折帛納銀之害如所請除之 大學衍義補曰宋朝預買納絹謂之和買絹夫買而謂之和必兩無虧損上下同欲而無抑配之謂也當時所謂和買猶是民以乏錢而須賣官以先期而便民乃其後之弊且至與夏稅並輸民家營運生息之具悉從折計而爲民無窮之害矣開禧三年詔紹興府均數和買 先是孝宗乾道九年祕書郎趙粹中言兩浙和買莫重於紹興而會稽爲最緣田薄稅重詭名隱寄多分子戶自經界後至乾道五年累經推排減落物力走失愈重民力困竭若據畝均輸可絕詭戶之弊淳熙八年詔兩淮漕臣吳玘與帥臣張子顏措置子顏等言勢家豪民分析板籍以自托於下戶是不可不抑然弊必有原謂如浙東和買凡二十八萬一千七百三十有八合台明衢處婺之數不滿一十三萬而紹興一郡獨當一十四萬六千九百三十有八則是以一郡視五郡之輸而又贏一萬有奇此重額之弊也又如貨牛物力以其有資民用不忍科配酒坊鹽亭戶以其嘗趁官課難令再敷至於坍江落海之田壞地漂沒僧道寺觀之產或奉詔蠲免而省額未除不免陰配民戶此暗科之弊也二弊相乘民不堪命於是規避之心生而詭戶之志起舊例物力三十八貫五百爲第四等降一文以下卽爲第五等爲詭戶者志於規避往往止就一三十貫之間立爲砧基今若自有產有丁係真五等依舊不科其有產無丁之戶將實管田產錢一十五貫以下並科和買其一十五貫以下則存而不敷庶幾僞五等不可逃真五等不受困於是詔紹興府攢官田園諸寺觀延祥莊并租牛耕牛合蠲和買並於省額除之坊場鹽亭戶見數和買物力及坍江田放生池合減租稅物力並覈實取旨十一年臣僚言兩浙東西四路和買不均之弊送戶部給舍等官詳議鄭丙邱霽議畝頭均科之說至公至平詔施行之十六年知紹興府王希呂言均數和買曩者亟於集事不暇覈實一切以爲詭戶而科之於是物力



自百文以上皆不免於和買貧民始不勝其困乞將剋科和買二萬五十七匹有奇盡放則民被實惠矣於是詔下戶和買二萬五十餘匹住催一年又減原額四萬四千匹有奇均數一節令知紹興府洪邁從長施行光宗紹熙元年邁定其法上之詔依所措置推行至是又申此詔紹興貧民下戶稍寬矣 紹定時侍御史李鳴復奏曰會稽郡賦重民貧以和買一色言之其爲額當一路之半雖淳熙特與蠲減紹熙并與均科而民仍困於供輸此無他其爲額太重故也祖宗時貨輕而錢重錢之在官者先期而給絹之在民者易歲而輸官民相資是謂和買時異事變名存實亡價直勿償鑿空科取無復有所謂買矣送輸稍緩鞭撻卽加無復有所謂和矣嘉定庚辰朝廷將累歲實催之數按爲定額一半理估行之十四載民力稍寬端平初元復催正色二年仍行理估三年又催正色今以侍郎趙興權申請將列郡和買一體施行難乎其爲辭矣臣自到官以來士夫論議民庶陳情莫不以和買爲重困今不敢乞如淳熙之減額得如嘉定之一半理估足矣或曰放行一郡恐有援例而起者何以拒之是不然會稽之特加優恤以其爲額太重也以其有陵寢在也以其爲毓聖之地也無是三者而何例之援乎前淳熙十六年詔紹興府和買絹內特減四萬四千餘匹不聞他郡援例也況鑑湖古未有租今變爲湖田輸於大農者六萬此會稽額外之產也朝廷獨知取而不知予乎乞將和買絹一項仍照嘉定十三年例一半理估施行使怨咨之氣消歌頌之聲作此實祈天永命之一非但爲一郡設也

嘉定二年命臨安府物價俱給見錢 以臣僚言輦轂之下買物於鋪戶無從得錢凡臨安府未支物價令卽日盡數給還是後買物須給見錢違者許陳訴於臺

理宗嘉熙三年令諸路州縣官司買物並以時直不許輒用官價違者以贓定罪 自隆興元年詔軍興以來一

應收買軍需蓋造營寨之類並係科撥錢糧和買措置尙慮官吏貪緣掊斂不卽還直許令人戶越訴監司按治以聞淳熙元年罷市令司詔官司收買物色並依民間市價不得科抑減剋如違以違制論臨安府及屬縣交易僧保錢豁減十之五七年詔諸路州縣亦如之至是臣僚言今官司以官價買物行銷以時值計之什不得二三重以遷延歲月而不償胥卒並緣爲姦積日既久類成白著至有遷居以避其擾改業以逃其害者甚而日用所需瑣瑣之物販夫販婦所資錐刀以營升斗者亦皆以官價強取之終日營營而錢本俱成乾沒商旅不行衣食路絕乞申嚴禁從之 大學衍義補曰宮中用度或有所闕不能不求之市肆然不必設場務專官使遇有所用道廉謹之人齎見錢隨時價兩平交易而不折以他物不限以異時不易以壞幣則官府有實用而小民無怨聲矣

度宗咸淳元年閏五月以錢三十萬命臨安府通變平物價

遼太宗置南京城北有市百物山樾命有司治其征餘四京及他州縣貨產買遷之地置亦如之 時南京外城謂之漢城分南北市中爲看樓晨集南市夕集北市又上京南城亦謂之漢城南當橫街各有樓對峙下列井肆周廣順中胡嶠記曰上京西樓有邑屋市肆交易無錢而用布有綾錦

天顯四年七月觀市

聖宗統和三年十一月禁行在市易布帛不中尺度者

時以西幸又將東征故云行在

遼史食貨志曰令有司諭諸行宮布帛

短狹不中度者不鬻於市

大年七月觀市 至十九年七月又觀市二十一年五月又觀市

七年三月詔開奇峯路通易州市 時以南北府市場人少宜率當部車百乘赴集故有是詔 遼史耶律隆運傳曰統和中隆運爲大丞相以南京平州歲不登奏免百姓農器錢及請平諸郡商賈價並從之

興宗重熙十六年七月觀市 至二十一年七月又觀市

道宗咸雍七年四月禁布帛短狹不中尺度者 至太康七年十一月除布絹尺度短狹之令 太康六年七月觀市

金海陵正隆六年四月詔汝州百五十里內州縣量遣商賈赴溫湯置市 時幸汝州溫湯故有是詔

世宗大定二十四年八月詔免上京今年市稅 時以五月至上京

章宗明昌元年七月詔罷西北路蝦蟇山市場

承安元年五月以久旱徙市 越數日詔復市如常

五年正月如春水諭點檢司車駕所至仍令百姓市易

泰和三年四月諭省司官中所用物如民間難得毋強市之

宣宗興定三年正月議行均輸又勅和市邊城軍需無至抑配貧民

元世祖中統四年九月民間所賣布帛有疎薄狹短者禁之

至元元年正月立諸路平準庫 主平物價使相依準不至低昂至二十年十月又立和林平準庫

十三年正月立回易庫於諸路凡十有一掌市易幣帛諸物

勅大都路總管府和雇和買權豪與民均輸 按此與上條所係年月相連應係同時降敕

三月又敕上都和雇和買並依大都例至

十八年九月勅大都新安縣民和雇和買

十九年九月命軍站戶出錢助民和雇和買 先是十六年十月張融訴西京軍戶和雇和買有司匿所給價鈔

計萬八千錠官吏坐罪以融爲侍衛軍至是又有是命至二十八年二月伊蘇岱爾等言近制和雇和買不及軍家今一切與民同詔自今軍勿輸三十年十一月敕中書省凡出征軍毋以和雇和買煩其家

二十二年正月從右丞盧世榮奏立市易司 世榮奏隨朝官吏增俸州郡未及可於各都立市易司領諸牙僧

人計商人貨物四十分取一以十爲率四給牙僧六爲官吏俸國家以兵得天下不藉糧餽惟資羊馬宜於上都隆興等路以官錢買幣帛易羊馬於北方選蒙古人牧之收其皮毛筋骨酥酪等物十分爲率官取其八二與牧者馬以備軍興羊以充賜予帝善之

成宗元貞元年十二月詔大都路凡和雇和買及一切差役以諸色戶與民均當

二年正月詔蠲兩都站戶和雇和買 至大德元年十二月免上都至大都并宣徽等十三站戶和雇和買七年

三月追收原降除免和雇和市璽書

大德二年十二月詔諸路和市價直隨給其主違者罪之

武宗至大四年三月已時仁宗即位禁諸王駙馬經過州郡不得非理需索應和雇和買隨即給價

仁宗延祐七年十一月已時英宗即位平章政事特們德爾言和市織幣薄惡由董事者不謹請免右丞高昉等官仍令

郡縣更造徵其原直不許 元史姦臣傳曰英宗卽位特們德爾卽奏委平章王毅右丞高昉等徵理在京倉庫

所貯糧虧七十八萬石責償於倉官及監臨出內者所貢幣帛紕繆者責償於本處官吏之董其事者仍立程嚴



督違者杖之

明制內外軍民官司並不得指以和雇和買擾害於民如果官司闕用之物照依時直兩平收買或客商中買物貨隨卽給價如減駁價值及不卽給價者赴告上司以不應治罪 凡民間市肆買賣貨物價值須從州縣親民衙門按月從實申報上司以憑置辦軍需等項照價收買又各府州縣每月初旬取勘諸物時估逐一覆實依期開報毋許高檯少估虧官損民上司收買一應物料照依按月時估兩平收買給價毋致虧民及縱吏胥鋪甲剋落作弊 明史食貨志曰洪武時宮禁中市物視時估率加十錢其損上益下如此

太祖洪武元年十二月命較勘斛斗秤尺并定時估物價 詔中書省命在京兵馬司并營市司三日一次較勘街市斛斗秤尺并依時估定其物價在外府州各城門兵馬一體兼領市司 大明令曰斛斗秤尺司農司照中書省原降鐵斗鐵升較定則樣製造發直隸府各州及呈中書省轉發行省令各府依法製造較勘付各州縣倉庫收支行用其牙行市鋪須赴官印烙鄉村人民所用與官降相同方許行使 顧炎武日知錄曰法不一則民巧生故古帝王必以謹權量爲先務其於天下則五歲巡狩而一正之虞書同律度量衡是也其於國中則每歲而再正之禮記月令日夜分則同度量鈞衡石角斗甬正權概是也今北方之量鄉異而邑不同至有以五斗爲一斗者一闕之市兩斗並行至其土及以二百四十步爲畝亦有三百六十步七百二十步爲畝者其步弓以五尺爲步亦有六尺七尺八尺爲步者此之謂工不信度也

成祖永樂五年五月命有司歲辦物料悉給官錢非土地所有者禁勿取 開平衛卒蔣文靈言今有司歲辦各色物料里長所領官錢悉以入己名爲和買其實強取於民萬不償一若其土產尙可措辦況非土地所有須多



方徵求以致傾財破產者有之凡若此者非止一端今後宜令有司除常賦外妄取民一錢者以受財枉法論其各色物料非土地所有者禁勿取從之 明史食貨志曰永樂初斥言五色石者且以温州輪轡困民罷染色布

然內使之出始於是時工役繁興徵取稍急非土所有民破產購之軍器之需尤無算

仁宗洪熙元年六月

已時宣宗即位

趣中官在外采辦者還罷所市物

詔各處開辦金銀鈔造紙劄坐買靛青除已開

辦造完見收在官者解送外餘悉停罷以蘇民力其原差官員等速卽回還如託故稽遲以違制論又巡按浙江

御史尹崇高奏所差內官內使於浙江市買諸物每物置局拘集動擾供給繁勞朝廷所需甚微民間所費甚大

宜皆取回惟令有司買納帝諭尙書吳中等曰差遣中人本出權宜豈知勞擾如此今詔書已罷買諸物若買完

者卽令回京未完者悉皆停止又諭尙書夏原吉等曰各處軍民艱難已甚凡在先有坐派造辦絳絲紗羅毯段

香貨銀硃金箔及海味果品等物卽遣人馳驛往諭已辦完在官者令原差監辦官管運回京未辦者悉停罷如

歲額不在此例仍前科擾民者罪不赦 大學衍義補曰今宮闈官府有所置乏輒一切取之州郡州郡則取之

於民蓋於常賦外斂錢收買以應徵求及領價之際文移上下展轉伺候動經旬月所得不償所費凡買辦皆如

此九重上何由知之哉

七月諭工部察懲有司買辦物料短給價者 副都御史戈謙言朝廷買辦諸色物料有司給價十不及一況展

轉剋減物主所得幾何且一夫耕作除夏秋二稅所存無幾苟再侵耗民不貧困者寡矣願今後欲有買辦如果

不係軍需急用之物乞且停止候民力完實年穀豐稔然後派買實爲民便帝曰科買諸物每令實與價錢虧價

損民有司之過宜速行戒約有不悛者必加之罪

八月內官鄧和等奏奉敕修理南京宮殿當用金箔請令有司市買命於天財庫支鈔實用須依時直勿虧小民時應天府尹薛均奏自永樂二十年至今今年六月工部及光祿寺買民間緞疋等物價鈔乞於南京天財庫給民帝諭戶部曰有司不恤民如此其速支給今後官買物不卽給直者非坐有司十一月尙書吳中言製造御用物料不足帝曰服食器用當從樸素所用物料就庫藏中給取不必買於民十二月尙書夏原吉奏官買順天府民絲漆等物當給價鈔而所司折以靛青未便帝曰靛青非染工不用如不言幾虧民矣其悉給鈔靛青收貯以俟別用

宣宗宣德二年三月勅買事神之物毋得擾民 太常寺奏犧牲所羊少不足供祭請支價遣官收買於平陽府帝曰朕昔侍皇考見太常寺奏買犧牲聖意惓惓以事神爲重愛民爲心蓋事神之物若有一毫損民民心不悅神必不享爾等當體此意自是年之後每遇祀事必以爲誠

四月停陝西買辦 諭尙書吳中曰陝西去年薄收百姓艱難一切買辦之物悉停止

三年三月命各倉斗斛一準洪武中制度 各倉官爲較勘印烙木籌上刊年月及提調官吏姓名亦用印烙凡官斛籌非官印烙者不用私造者問罪至七年令重鑄鐵斛每倉各以一給之永爲法則較勘行使

四月令從公買辦毋蹈前弊 帝聞買辦物件支官錢屢有告訐剋減者故有是令

五年二月詔凡土產之處如收買數多量免他役以優恤之不許概於不產之地收買科擾 至八年令各處買賣諸色物件聽差殷實大戶齎價於出產地方收買供用四月以各處旱下寬恤詔凡坐派買辦采辦物件及虧欠孳牧牲口并一應紙劄悉行蠲免九年正月以揚州淮安鳳陽徐州等府州縣連歲亢旱勅巡撫侍郎曹弘一

切實辦盡行停止越數日又詔買辦銅鐵諸物俱待秋成後減半解納所遣官員卽令回部十年正月復勅停罷南京工部及各處買辦物料

六年十二月內官袁琦等以采辦爲名虐取財物伏誅 內官袁琦狡險欺誣假以幹辦公務奏遣內官內使凌辱官吏毒虐軍民恣肆貪婪金寶錦綺以千萬計恃伏凌遲并斬阮巨隊等十人勅天下諸司知之 食貨志曰帝因泰安稅課局大使郝智言召還所遣官勅自今更不許輒遣自軍器軍需外凡買辦者盡停止然寬免之詔屢下內使屢勅撤還而奉行不實宦者輒名采辦虐取於民誅袁琦阮巨隊等十餘人患乃稍息

九年令應天府買辦物料於都稅司支鈔給主

英宗初罷諸處采買及造下西洋船水諸冗費

正統元年令部頒鐵斛等於倉庫 各布政司府州縣倉分歲收糧五十萬石及折收倉庫歲收布絹等物十萬疋以上者工部各給鐵斛一銅尺木秤各一 是年二月陝西按察副使金濂奏西安原降鐵斛銅尺木秤便於收支今甘肅等衛倉庫因無前項斛與尺秤作弊多端乞行各布政司及直隸府州悉照原式成造以憑收支較勘九月當運糧儲總兵官各處巡撫侍郎至京會議軍民利便事宜一蘇松諸處官倉原有洪武中頒降鐵斛升斗年久廢失出納之際軍民受弊應令府縣量給合用鐵斛升斗備料送付南京工部會官依式鑄造頒給備用命准行之

二年命御史會同戶部及府縣官監視買辦物料 凡買辦物料戶部委官一員會同府縣委官拘集行鋪估計時價關出官錢仍委御史一員會同給與鋪戶收買送納至三年又令遇有買辦之類皆估計價鈔數目照舊具



奏限一月內赴庫領散不許過違八年又令朝廷所用物件免有司買辦查出產地地方於存留糧內折收解京沿途官司應付船隻脚力南直隸府并山東者送北京該衙門收江南廣東浙江湖廣江西四川者送南京該衙門收歲終具奏九年令歲用果品廚料照舊支領官錢派買不許於存留糧內折徵又凡遇造作等項急用物料止於官庫關用有不敷者方許具奏先給官價派買

四年四月勅遼東都司衛所凡祭祀儀物俱照洪武定例支取官錢兩平收買毋許科斂害人 從署都指揮僉事畢恭言也

景帝景泰二年頒等秤天平於內外 令工部成造等秤天平各四十頒給戶部及在外收支衙門掌管用使其所屬各許依式成造應用

六年令京城內不係長久開鋪及小本買賣俱免置辦

憲宗成化元年六月命光祿寺祭祀筵宴等俱循舊例買辦 每年牲口不許過十萬果品不許粘砌至四年給事中陳越言光祿市物槩以勢取負販遇之如被劫掠夫光祿所供昔皆足用今不然者宣索過額侵漁妄費也大學士彭時亦以爲言請照宣德正統間例斟酌供用禁止買辦於是減魚果歲額十之一

二年五月命內官監斟酌年例物料其急於用者出內帑銀市之不急者姑已之 工部奏內官監請促辦年例物料若松木黑炭等共計七百七十七萬有奇緣四方水旱相仍民困已甚若復徵需似乖初年明詔與民休息之意帝以小民貧困正當寬恤故有是令

五年命重鑄鐵斛依式置造以爲永久定規 以新舊鐵斛大小不一仍命工部照洪武年間鐵斛式樣重新鑄

造發江南江北山東河南兌糧諸處令兌糧官員依式製造木斛送漕運衙門較勘印烙給發交兌至十五年又令鑄鐵斛頒給江西湖廣二布政司及各兌糧水次并支糧倉分較造木斛印烙收用其鐵斛仍識以成化十五年奏准鑄成永爲法則十三字及監鑄官員匠作姓名於上 是年又令京城內外并順天府所屬地方凡諸色貨物行人依式製造平等斛斗秤尺天平等赴官較勘印烙方許行使違者如律治罪知情扶同互相借用者事發一體究治

孝宗弘治元年命光祿減增加供應 初光祿俱預支官錢市物行頭吏役因而侵蝕乃令各行先報納而後償價還有游手號爲報頭假以供應爲名抑價僭取以充私橐御史李鸞以爲言帝命禁止

七月罷鎮守內外官采辦 先是仁宗時令中官鎮守邊塞英宗復設各省鎮守又有守備分守中官布列天下及憲宗時益甚購書采藥之使搜取珍玩靡有子遺抑賣鹽引私采禽鳥糜官帑納私賂動以巨萬計太嶽太和尚降真諸香通三歲用七千斤至是僭之內府物料有至五六倍者孝宗立頗有減省至是時甘肅巡撫羅明言鎮守分守內外官競尙貢獻各遣使於所屬邊衛搜方物名曰采辦實扣軍士月糧馬價或巧取番人犬馬奇珍且設膳乳諸房僉廚役造酥油諸物比及起運沿途騷擾乞悉罷之報可

十八年八月時武宗已即位令各處歲辦非土產及有事故皆酌價赴京收買 給事中戴銑言各處歲辦多非土產勞費不堪宜令實開土產有無造冊送部會派之時有者仍納本色其非土產及兵荒事變令通融酌量齎價赴京收買從之至正德元年正月給事中周璽等言近來工作日繁科派日增皆近倖好興土木藉此占役軍夫規取料價且因勞以邀賞耳今後物非土產宜勿派工役果不可已者令部科估計後奏行下所司知之

武宗正德元年頒銅法 時議准工部行寶源局如法製造銅法三十二副每副大小二十箇俱鑿正德元年寶源局造字號送部印發浙江等布政司及各運司并南直隸府州各依式樣支給官錢一體改造用使

二月命重刊戒諭收納之旨於諸司永示遵守 給事中鄒軒等奏內府各監局各庫各倉場及各門內官內使人等每緣收納錢糧刻削無厭先帝晚年洞察民隱頒旨戒諭今復玩愒恬不知畏諸所解納百方巧取粟米布絹價倍時估民甚苦之宜令諸司重刻諭旨懸布遵行凡故違者罪無赦

世宗嘉靖二年定市易諸法 凡城市鄉村諸色牙行及船埠頭准選有抵業人戶充應官給印信文簿附寫客商船戶住貫姓名路引字號物貨數目每月赴官查照私充者杖諸物行人評估物價或貴或賤令價不平者計所增減之價論罪買賣諸物兩不同而把持行市專取其利及販鬻之徒通同牙行共爲姦詐者杖若見人有所買賣在旁高下比價以相惑亂而取利者笞凡私造斛斗秤尺及作弊增減者官降不如法者提調官失勘者其在市行使不經官司較勘印烙者倉庫官吏私自增減官降收支不平者監臨官知而不舉及失覺察者凡造器用之物不堅固真實及絹布等紕薄短狹而貨賣者各定罪有差

四月令京城辦納物料皆先給與價 給事中汪應軫等請革京城鋪戶言古者徙豪傑以實京師我朝亦有富戶皆重根本至於和買之法則自宋南渡始殊非善政今和買不給直獨累京城以牋根本其不善尤有甚焉臣以爲革之便如不可革則宜照例給價格在兩平事下戶部議覆請令戶工二部凡辦納物料皆當先給以價從之

二十七年五月給事中羅崇奎等言諸商重困之弊帝嘉納之 時戶部言京師召集諸商納貨取直內則據諸

司之通關實收外則據兩縣總部九門官之時估情法適中公私均便邇者民僞日滋初意漸失其入官應役者皆備販賤夫漂流弱戶有司利其無援輒百方牟奪之而富商則有一二置籍往往詐稱窮困旋入旋出非所以安人心而一治體也請以十年爲率命科道官一爲清理貧者除之富者卽豪強不得隱匿帝命科道官如議選委命審覈戶口徧置尺籍務在公平足以經久旣而崇奎等復言部臣之說意在革弊而未悉弊源竊謂今日諸商所以重困者其弊有四夫物有貴賤價有低昂今當事者賤則樂於減貴則遠嫌而不敢增一也諸商殫力經營計早得公家之利而收納不時一遭風雨遂不可用二也旣收之後經管官更代不常不卽給直或遂以沈閣三也幸給直矣而官司折閱於上番校齟齬於下名雖平估而所得不能半之四也四弊不除竊恐編審未久而潰亂又隨之矣臣以爲宜先去四弊而不必復爲編審卽編審亦不必科道其各場監收主事滿一歲然後代毋數更易帝嘉納其言令戶部參酌行編審用科道官仍如前議

臣等謹案先是上供之物任土作貢曰歲辦不給則官出錢以市曰采辦其後本折兼收采辦愈繁於是召商置買物價多虧商賈匿迹至是戶部以覈實編審爲請崇奎等復言諸弊若除商自樂赴帝雖納其言而仍編審如部議至二十九年工科又奏鋪商編審之日舊商報之臣等核之報之不實則失在舊商核之不真則失在臣等若豪猾之徒公以賄免則罪在姦商乞勅部卽令新商投認供役其有遷延遲誤賄託求退者許送法司究罪則鋪商無編累之苦而科臣等亦可免公役耽延之慮矣蓋當時召商及編審之弊大略如此

三十一年更定時估法 自本年爲始每半年一次將供用等庫并各倉場合用糧草等項令山東河南二道管糧官員查訪行令宛大二縣造冊送科道與巡視中城御史及該司與九門委官公同參酌如先估與市價相合



不必更易其間物料時有貴賤價有低昂應增應減務酌量時直上半年不過正月下半年不過七月依期照例會估三十三年又行令十三布政司南北直隸所屬凡遇會派年例錢糧務以京估爲準有餘者減不足者增穆宗隆慶四年六月戶部條議恤商大事從之一定時估物價與時低昂而錢糧因時辦納若先時估計則貴賤無憑此後估價上半年定於五月下半年定於八月務隨時估價不得執一一議給價太倉關各草場料草原數少者給以全價數多者給以三分之一完日補給皆以時估爲率一嚴禁革各庫監局及牛羊象馬房等倉西安等門典守官吏有索求抑勒者悉治其罪一裁冗費量減各倉場草束斤數及腳夫庫秤之冗食一酌坐買凡草料數多一時難猝辦者量於秋冬孟月坐買不得仍前全坐致費高價陳草發賣或如數補放未給價者速給之一公衆報各商果貧困不能供役者具狀驗實方許舉保富戶更代

神宗萬曆九年命加減物料價銀 令九門鹽法委官會同科道將各倉場料草及各庫物料價銀參酌往年近日舊冊量加增減著爲定規以後非物價大相懸絕不得再行會估

熹宗天啟元年三月戶部尙書汪應蛟覆奏甲丁庫錢糧四款從之一免稅謂丁字庫油漆銅錫等項既派商辦納復照單比稅各商何堪宜移知宣課司凡召辦俱免納稅以滋重困一革鋪墊謂外解錢糧鋪墊已屬陋規此外復有茶果見面科斂名色宜嚴諭庫端盡行裁革一截支謂商價不給輒以揭借傾家今後召買必先給價如恐領銀虛冒應照截支之議錢糧收到卽給價銀未完之數另行追比續完之價再爲截支一平估謂京師物價騰貴先年會估較今價不啻天淵容移知巡視諸臣及劄九門鹽法部司等官會同估直照時價通融增減仍責商人召辦物料依期進納悉從所請至三年六月給事中郭興言等奏京師有上納之錢糧便有鋪墊之常例

敲骨剝髓牢不可破先年巡青商人止借辦草場草料尙苦不支後因十庫商人巧爲脫卸致令巡青商人代辦十庫錢糧貧役重累膏盡血竭查萬歷四十八年以前商人無十庫之累夏秋估價毫不假借每歲費銀止二十七萬餘兩自天啟元年代辦十庫錢糧商人稱苦議價不免稍寬歲費幾至三十五萬今正值春估之時增之則病國減之則病商展轉反覆計無所出莫若查照舊規免其代辦敕令巡視十庫諸臣照舊招商供辦事有專屬責無他諉一舉而兩得矣詔付部議

臣等謹案食貨志自歲辦改爲采辦不免加派累及鋪戶然嘉靖末年歲用止十七萬兩隆慶時裁爲十五萬萬歷初年減至十三四萬中年漸增幾三十萬而鋪戶之累滋甚時中官進納索賄名鋪墊錢費不貲所支不足相抵民不堪命相率避匿乃僉京師富戶爲商令下被僉者如赴死重賄營免官司密鉤若緝姦盜至天啟時而商累益重乃有不得一錢者矣

五年七月巡青給事中霍維華等以商人苦累酌議規則命如議行之 一議估價物價與時消長原無一定乃從前估價止就舊數稍爲增減今議依季定估照市價不得一毫任意增減一議放銀各商領銀漫不稱兌且如搭錢而復折銀暮四朝三總屬敝政今議著各商公同敲針照數稱兌不得分毫短少其辦完料價及時給放毋得因循滋累一議僉報商人每遇僉報或求情面倖免或挾夙恨妄報株連蔓引延累無窮今議定編審之期卽著舊役商人各自查訪每一人許報二名二名擇僉一名如報者不堪卽著舊商仍自充役或不及編審之年有物故消乏查審情真者亦酌此法行之則事不煩而民不擾亦足免衙役市棍詐騙之害矣命如議申飭行之大學衍義補曰昔人謂市者商賈之事古之帝王其物貨取之任土作貢而有餘未有市物者也市昉於周官泉